


**A** *rubá***A** *ntaño*

Den e Aruba di Antaño, cine semper a hunga un papel importante di atraccion y entretenimento den pueblo. Esaki tin un storia masha largo su tras.

Pa cuminsa cu e promé pelicula cu a yega di ser exhibi riba Aruba y na unda. Bueno den curá di e edificio millonario cu ta keda den Zoutmanstraat, unda cu ainda por ser mirá parti di e prome pantalla cu tabata un muraya blanchá. Esaki a pasa di un man pa otro (di Henriquez pa de Veer).

Despues a bini e cadena di teatros de Veer, cu su Teatro Gloria y cu Mau bendiendo su pinda dilanti di e porta. Despues San Nicolas a bin haya Cinelandia, Teatro Royal cu despues a bira Teatro Principal.

Un otro cu a bini den e circulo di teatronan pa cine, tabata esun di Rialto, primeramente di Sr. Arturo Arends (q.e.p.d.). Awe (foto) e Rialto a bira caminda nos tin asina tanto di e documentonan di nos Aruba Antaño warda, cual un dia ta di spera cu esaki lo pasa pa un edificio mas grandi, ya cu ta trata di nos Archivo Nacional.

Bolbiendo riba cine, Rialto cual foto ta acompaña e columna aki, den nos memoria Rialto su prome pelicula tabata "Anthony Adverse" protagoniza pa Frederick March, un pelicula di e compania Warner Brothers. Di e cinenan manera nan ta ser yama nos conoce Teatro Gloria cu a kima dos biaha, Teatro Rialto, Teatro Royal, Cine Aruba, Cinelandia, Teatro Aurora (sta. Cruz), Cecilia Theatre y uno na Eagle. Esaki tabata e golpi cu a caba cu e empresa di Rialto y Cecilia.

Tabatin enganche (dos persona cu un ticket) na prijs di un yotin y un florin, cu a bira e golpi fuerte den e competencia di e pantalla grandi pa Rialto. Tur a bira cadena de Veer, manera un monopolio.

Nos a mira actuacion di Carlos Gardel, tanto den teatro Gloria como den Teatro Royal (awendia Teatro Principal). Den Rialto nos a mira y scucha Tali Lopez (q.e.p.d.) canta Sus Ojos Se Cerraron den un obra teatral cu su novia cu despues a bira su señora. Despues nos a mira tambe Moi Galante cu su show musical den e teatro aki. Ta hopi tin di papia di cine y teatro riba Aruba, pero nos ta laga un tanto pa otro biaha.